



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

36. Kalenderwoche – ab 5. September 2010

Sonne im leborfluss

Mir sin im Uhrloob in Groadsjen gewähsn. Das is dord undn an dor Adria, was e Deel vom Middlmähr is. Un isch muss saachn, das Wassor... werglisch so blau, wie off de Bosdgarnd! Jedn Daach! Un jedn Daach blauor Himml! Zweek Wolkn hammor ma gesähn.

Was die sonsd so mid die Wolkn machn dun dord undn, das ham mir nisch rausgegrischd. Off alle Fälle hamse in die ganzn firrzn Daache grade ma zwee flieschn lassn. Ährlich - wens hoch komm dud, warns finfe! Un dann solsche zardn, ganz dinne, wie Zuggorwadde. Sonsd had de Sonne gegnalld. Erbarmungslos! Mir ham manschma geschwidzd wie de Schweine. Wobei - isch weef eischendlich gahr nisch, ob Schweine so schwidzn kenn, wie mir geschwidzd ham?

Guhd, mor hädde ooch kenn dähn ganzn Daach im Mähr rumbaddln... da hädde mor nisch schwidzn missn, abor mir - also isch un meine Gudste - mir sinn ehm ooch e bißl neugierisch - so off Land un Leide un Gulduhr! Bloß jedn Daach am Schdrand rumhäng un am Ende aussähn, wie de Beduihn - braun wie Affnledor - nee, das is uns nischd. Mir wolln ooch bißl was sähn un erlähm.

Bloß nu - bei schdändisch iebor dreißisch Grad dursch de Bodahnig drambln... Schdadtbummln... odor andiege Schdeene anguggn von de Reemor... - da had dor Schbaß ehm ooch eene Gränzn! Ab un zu wolln mir dann ehm ooch ma ins Wassor.

Bloß fiehr rischdischn Schdrandeinsadz sin mir nisch ausgeriseded gewähsn. Grade ma, dass mir e bißl Sonnengrähme midhaddn. Die, die da jedn Daach gleich nachm Friehschdiggn nunnor zum Schdrand marschierd sinn... villeischd hunnord Medor Weesch... - die haddn von Schlauchbood,

iebor Gembingschdiehle, bis zum Sonnenzeld alles dabei. Un de Schrandlieschn, die eischendlich fiehr alle da sinn, ham die die ganzn Daache fiehr sich in Beschlach genomm. Wahrscheinlich mussde immor eenor von dor Sibbe gleisch nach Sonnenoffgang nunnor zum Schdrand renn - de Lieschn sischorschdeln! Wenn mir irschendwann ma am Schrand offgedauchd sinn, war jednfalls keene Liesche mähr frei. Mir ham dann offm Handdusch unnor so eim kleen Sonnschirm, dähn mor in dor Nohd dord gekoofd ham, gehoggd - un ham wahrscheinlich een ziehmlisch jämmorlich Eindrugg hinnorlassn. Schrandundauchlich!

Längor als wie e gnabbes Schdindschn hammors dann ooch seldn ausgehaldn. Zu zweed unnor so eim kleen Sonnschirm... irschendwas is immor in dor Sonne gewähsn - endwedor dor Kobb odor de Beene. Odor mir häddn schdehn missn. Abor das hädde dann noch bleedor ausgesähn.

Erschd geeschn Ahmd wars dann e bißl angenähmor. Bloß da mussdn mir ja zum Ahmdbrod im Hodell sein. Weil mir ja mid Halbbangsjohn haddn. Wobei - das Ahmdbrod off dor Hodellderasse, das war jedn Daach de scheensde Jahreszeit des Daaches. Dann noch e Gläsl Wein... Bligg offs blaue Mähr... ohm dann de erschdn Schderne... dor Monde... e bißl Wind... nee, dor Siedn had durschaus ooch seine scheen Seidn! Bloß ehm e bißl viel Sonne!

Eduard Sachsenmeyer